

Riba e prome dianan di e think-tank

Participantenan ta pone enfasis riba temanan, publico, coleccionnan y investigacion

ORANJESTAD - Guia pa Maria Piacente, Yvonne Tang y Katherine Molinieux di Lord Cultural Resources, participantenan den e think-tank organisa pa Fundacion 1403 y Museo Arqueologico Nacional Aruba a cuminsa pa identifica varios posibel tema y topico cu lo por ser incor-

pora den un exposicion internacional tocante e pasado Amerindio di islanan cu herencia Hulandes den Caribe y nan bisiñanan.

Riba e prome dia a haya un introduccion general cu a muestra cual ta e 'trends' nan awendia den tiponan di exposicionnan similar rond

mundo.

Participantenan despues a traha den tres grupo pa identifica posibel tema y topiconan di un exposicion cu lo mester hiba e cultura nativo rico di e region Caribeense mas cerca di comunidad. A resalta e interaccion di e participantenan internacional y esnan local. E exercicio combina cu creatividad a hiba na un resultado diverso. E tema di identidad a resalta caminda a ser poni enfasis atrobe den e aspecto multicultural di e region y den hecho cu migracion tawata y ta sigui ta algo importante pa cultura y sociedadnan. Un idea sumamente atractivo y innovado ta pone enfasis riba e importancia di lama. Lama ta un 'paisahe' mas ora bo pensa con importante e ta y semper tawata pa e comunidad Caribeense y ta e aspecto fisico natural cu ta uni tur isla y continente. Un otro topico cu a resalta ta esun di 'hogar' pues cu un exposicion lo por explora e tema aki den transcurso di tempo y for di angulo di cada comunidad caminda e exposicion aki lo ser presenta.

E di dos dia a habri cu un presentacion riba e audiencia di e exposicion pues pa ken esaki lo ta y den ki forma mester presenta esaki. Participantenan local a resalta dunando ehempelnan concreto di e



retonan pa haya comunidad local y tambe turistanan na exposicionnan. E importancia di investigacion y e recurso grandi den coleccionnan di institucion y comunidadnan a ser discuti den grupo y na final di e di dos dia a papia tambe di con lo por financia un proyecto di e magnitud aki.

Publico por sigui e desaroyo di e think-tank riba e paginan di Facebook 'Archeo' y 'National Archaeological Museum Aruba'. Riba e combinacion di foto por mira e participantenan durante prome dianan di Think Tank organisa pa Fundacion 1403 y Museo Arqueologico Arubano. □

